

Malaysia diiktiraf pusat peneraju fintech Islam

Oleh Mahanum Abdul Aziz - Ogos 16, 2022 @ 12:00pm
mahanum_aziz@bh.com.my



Sultan Perak, Sultan Nazrin Muizzuddin Shah - Foto BERNAMA

KUALA LUMPUR: Malaysia terus mencatatkan kemajuan dalam perkembangan kewangan Islam dengan kini menjadi pusat peneraju teknologi kewangan (fintech) Islam.

Sultan Perak, Sultan Nazrin Muizzuddin Shah bertitah, sebanyak 47 syarikat fintech Islam beroperasi di Malaysia setakat Ogos 2022 berbanding 41 di Indonesia, 29 di Emiriah Arab Bersatu (UAE) dan 25 di Arab Saudi.

Baginda yang juga Penaung Diraja bagi Inisiatif Kewangan Islam Malaysia bertitah, syarikat permulaan fintech konvensional juga baru-baru ini telah menceburi bidang Islam di Malaysia.

"Urus niaga fintech Islam dijangka mencecah AS\$128 bilion menjelang 2025, meningkat berbanding AS\$49 bilion pada 2020.

"Pertumbuhan kukuh sebanyak 21 peratus setahun itu akan didorong oleh penyediaan perkhidmatan kewangan kepada populasi dan sektor yang tidak mempunyai perkhidmatan perbankan dan kurang mendapat perkhidmatan, termasuk perusahaan kecil dan sederhana serta perniagaan mikro," titahnya pada Forum Kewangan Islam Kuala Lumpur 2022 (KLIF 2022) di sini, hari ini.

Raja Nazrin bertitah, pasaran modal negara termasuk pasaran modal Islam terbukti kekal kukuh meskipun berdepan persekitaran mencabar dicetuskan pandemik.

Baginda bertitah, sekuriti berlandaskan Syariah kini mewakili hampir 80 peratus penyenaian di Bursa Malaysia.

Malah, titah baginda, Malaysia terus menerajui pasaran sukuk antarabangsa, dengan kira-kira 40 peratus sukuk tertunggak antarabangsa dan pada Jun 2022, ia mewakili hampir 30 peratus keseluruhan terbitan sukuk global.

Melangkah ke hadapan, Raja Nazrin menitahkan, Malaysia perlu menyediakan keadaan yang betul untuk memastikan pertumbuhan kewangan Islam yang berterusan.

Titah baginda, Malaysia mesti berusaha untuk membangunkan industri kewangan Islam yang lebih komprehensif dan berdaya tahan menerusi keteguhan rangka kerja undang-undang dan tadbir urus Syariah, dinamik pasaran yang saling berkaitan, kekuatan infrastruktur kewangan dan menerusi produk dan perkhidmatan yang responsif, canggih dan mudah diakses.

"Memandang ke hadapan, ciri utama sektor ini ialah dimensi antarabangsa kerana kewangan Islam menjadi bahagian yang semakin penting dalam landskap kewangan global.

"Industri yang masih terkunci dalam pasaran domestik tidak mungkin berkembang maju. Ini lebih-lebih lagi untuk produk dan perkhidmatan kewangan.

"Peluasan pasaran melangkaui Malaysia harus terus diberi keutamaan sebagai sebahagian daripada pembangunan dasar dan hala tuju untuk sektor berkenaan," titahnya.